

MOSAMARIA

wa kgaugelo



MAPULA MARTHA MALATJI

Diswantšho ka Jonanda Kannemeyer

MOSAMARIA WA KGAUGELO

© 2023 One Heart
Kgatišo ya pele 2023
E gatišitšwe Afrika Borwa
ISBN: 9781776475636

Puku e ka phatlalatšwa ntle le tefo, efela go kgahlanong le molao go e rekiša. Puku e humanwa go www.oneheartforkids.co.za.

Ka tumelelo ya bagatiši, puku e ka abelanwa ka go gatišwa, go fotokhophiwa goba ka mokgwa wa eletroniki. Puku ga se ya swanela go fetolwa ka mokgwa ofe goba ofe. Go kgopela tumelelo ya go gatiša puku o ka ikgokaganya le bagatiši.

One Heart
17 Pelikaan Street
Stellenbosch, 7600
South Africa
www.oneheartforkids.co.za

Mongwadi: Dr. Mapula Martha Malatji
Mothaladíswantšho: Jonanda Kannemeyer
Morulaganyi: Elizabeth Phala
Motlanyi: Imprint Publishing

Dikanegelo Tša Beibele
TESTAMENTE YA KGALE

LUKA 10

MOSAMARIA
wa kgaugelo

Ka letšatši le lengwe, setsebi sa molao se ile sa botšiša Jesu gore: “Morutiši, ke swanetše go dirang gore ke be le bophelo bjo bo sa felego?” Jesu o rile, “Rata Modimo ka pelo ya gago ka moka, o rate wa geno bjalo ka ge o ithata. Jesu a re go yena: Ke eng seo se ngwadilwego molaong? O bala eng moo?”

Setsebi sa Molao se ile sa araba ka gore: “Rata Jehofa Modimo wa gago ka pelo ya gago ka moka le ka moya wa gago ka moka le ka matla a gago ka moka le ka monagano wa gago ka moka,” le gore: “Rata wa geno bjalo ka ge o ithata.”

Jesu o rile, “O arabile gabotse, dira se gomme o tla phela.” Eupša setsebi sa Molao se be se nyaka go bontšha gore tsela yeo a bego a phela ka yona e be e lokile, ka gona a botšiša Jesu a re: “Moagišani wa ka ke mang?”





Ka gona Jesu o ile a mmotša kanegelo: Monna yo mongwe o be a tloga Jerusalema a eya Jeriko ge bahlakodi ba bangwe ba mo hlasela. Ba ile ba tšea se sengwe le se sengwe seo a bego a e na le sona, ba mmetha gomme ba mo tlogela ka thoko ga tsela, a le makgatheng a lehu.

“Moperisita o ile a tla a sepela tseleng yona yeo. Ge a bona monna yo a gobetšego, a tshelela ka lehlakoreng le lengwe, a se eme go thuša. Molefi, monna yo mongwe wa bodumedi, le yena a feta. Le yena o ile a bona monna yo a gobetšego, a feta ka lehlakoreng le lengwe a sa mo thuše.” Ke moka Mosamaria a tla.”





Ka nako yeo, Basamaria le Bajuda ba be ba sa kwane. Ba be ba etšwa ditšhabeng tše di fapanego gomme ba sa ratane. Eupša Mosamaria yo o be a na le pelo ye botho.

Jesu o rile, "Ge Mosamaria a bona monna yo a gobetšego, a mo kwela bohloko, a tlema dintho tša monna yoo gomme a bea monna yoo godimo ga pokolo ya gagwe. Ke gona a mo iša ntlong ya baeti a mo hlokomela. Le gona o ile a nea mong wa ntlo ya baeti tšhelete e itšego gore a hlokomele monna yo a gobetšego."



Jesu o ile a lebelela setsebi sa molao gomme a botšiša a re: “Ke mang go ba bararo bao o naganago gore e be e le moagišani wa monna yo a wetšego diatleng tša bahlakodi?”

Setsebi sa molao se ile sa araba ka gore: “Yo a mmontšhitšego botho.”

Jesu a araba ka gore: “O nepile. Sepela o dire se se swanago.”





Thapelo

Morena yo a rategago, hle nthuše go bontšha lerato le botho go bohle, go sa šetšwe gore ke bomang, go swana le Mosamaria.

Dipotšišo

1. Potšišo ya mathomo ya setsebi sa molao ke efe?
2. Jesu o rileng ge a araba potšišo ya mathomo?
3. Monna wa go hlakodišwa o be a etšwa kae a eya kae?
4. Ke mang monna wa bobedi wa go se fe mogobadi thušo?
5. Mosamaria wa kgaugelo o dirile eng go thuša yo a gobetšego?

Selepe le ditšhotšhi

Monna yo mongwe wa leina la Selepe o be a agile ntlo ya majwang ya serekelele, a dula a le tee gona fao sethokgweng. O be a ipeetše mabele ka sešegong. A tšwa a ya go tsoma ka letšatši le lengwe. Tseleng a bona ditšhošwane di thušana go rwala dijo go ipeela ka nako ya marega. Ke ge a kotama go lebelela mokgwa wa tšona wa bophelo. A lemoga gore ditšhotšhi di a thušana ka gore di kwana le baagišani.

Tšhotšhi ye tee e kgona le go kuka kota ka hlogwana ye nnyane. Maotwana wona a lekana le dithatana, eupša di bohlale. Selepe a nyanya tsebo eupša gwa ba bothata go e šomiša.

Ge a fihla gae a hwetša mpša ya go swarwa ke tlala ye a sa e tsebego ka gore yena ga a na baagišani. A e raka.



Gosasa a ya nokeng go kga meetse ka kgamelo. Meetse a gona a be a tletše digwagwa le ditolotswane. A di ntšhetša ka ntle gore yena a kgone go kga meetse a sa šitišwe ke selo. Tseleng kgamelo yela ya thoma go dutla, a bowa a swerwe ke lenyora. Mmele wa hloka matla a go sepelela kgole.

Ge a bona mpša kgojana a e bitša ka molodi. Ya tla ya dulela go goba gauswi le yena. Gwa fihla tonki ye e ilego ya mo pepula ya mmea gare ga lešaba la batho ba swere dijo le dino, ba mo abela tšona a ja, a nwa. Pelo ya gagwe ya fetoga ge a gopola ka moo makeke a šomišanago ka gona.

Ke moo a lemogilego gore ga se yena fela lefaseng, go na le batho ba go se be kgopo bjalo ka yena. A huduga ntlong, a ya go dula gareng ga batho moo a bego a ba rerela ka bohlale bja ditšhotšhi. Batho ba thoma go ratana le go diragatša lerato ka go thušana.



Thapelo

Tatawešo wa Magodimong, re kgopela gore o re šireletše go ba babe. Re hlahle gore re rate ba bangwe ka go diragatša lerato la thušo.

Dipotšišo

1. Naa mathomong Selepe o be a na le baagišani?
2. Ke eng se se laetšago gore ditšhotšhi di a thušana?
3. Naa o be o ka dirang go thuša mpša ya go swarwa ke tlala?
4. Ke diphoofolo dife tše di dirilego gore Selepe a phele le batho?
5. Batho ba fetogile bjang ge ba ekwa Selepe a rera ka ga ditšhotšhi?


Mantšu a maswa

Ditolotswane = bana ba digwagwa

Serekelele = rantabola

Kgopo = pelo ye mpe

Mosamaria wa kgaugelo ke ye nngwe ya dipuku tše 20 tše di bontšhago dikanegelo tše 10 tša Testamente ya kgale le tše 10 tša Testamente ye nshwa, moo ye nngwe le ye nngwe ya tšona e nago le ditiragalelo-maphelong, di ithekgile ka tša Beibele.



Puku_1




Puku_2



Puku_3



Puku_4



Puku_5




Puku_6




Puku_7




Puku_8



Puku_9



Puku_10




Puku_11




Puku_12




Puku_13



Puku_14




Puku_15



Puku_16




Puku_17



Puku_18



Puku_19



Puku_20

Mosamaria wa kgaugelo

Kanegelong ye, re rutwa gore moagišani ga se fela wa ntlo ya kgauswi. Lefaseng ka moka re baagišani ba re swanetšego go ratana, ra thušana ka lerato.

Selepe le ditšhotšhi

Kanegelong ye, re ithuta ka bohlale bja ditšhotšhi tšeo di šomago mmogo le go thušana. Re sedimošwa gape ka go ratana gore seo ke bohlale bjo bo tšwago go Modimo.



9781776475636

Sepedi